

(षष्ठोऽध्यायः ॥ वर्गाः 1-30)

(11)

19

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता इन्द्रः

एवा त्वामिन्द्र वज्रिन्नत्र विश्वे देवासः सुहवास ऊमाः |
महामुभे रोदसी वृद्धमृष्वं निरेकमिद्वृणते वृत्रहत्ये || 1 ||
अवासृजन्त जिब्रयो न देवा भुवः सम्राळिन्द्र सत्ययोनिः |
अहन्नहिं परिशयान्मर्णः प्र वर्तनीररदो विश्वधैनाः || 2 ||
अतृष्णुवन्तं वियतमबुध्यमबुध्यमानं सुषुपाणमिन्द्र |
सप्त प्रति प्रवत आशयान्महिं वज्रेण वि रिणा अपर्वन् || 3 ||
अक्षोदयच्छर्वसा क्षामं बुध्नं वार्णं वातस्तविषीभिरिन्द्रः |
दृळ्हान्यौभ्रादुशमान् ओजोऽवाभिनत्कुभः पर्वतानाम् || 4 ||
अभि प्र दद्गुर्जनयो न गर्भं रथाइव प्र ययुः साकमद्रयः |
अतर्पयो विसृत उब्ज ऊर्मिन्त्वं वृतां अरिणा इन्द्र सिन्धून् || 5 ||
त्वं महीमवनिं विश्वधैनां तुर्वीतये वय्याय क्षरन्तीम् |
अरमयो नमसैजदर्णः सुतरणां अकृणोरिन्द्र सिन्धून् || 6 ||
प्रागुवो नभन्वोरे न वक्रा ध्वसा अपिन्वद्युवतीर्हृत्तजाः |
धन्वान्यज्रां अपृणकृषाणां अधोगिन्द्रः स्तर्योरे दंसुपत्नीः || 7 ||
पूर्वीरुषसः शरदश्च गूर्ता वृत्रं जघन्वां असृजद्वि सिन्धून् |
परिष्ठिता अतृणद्वधानाः सीरा इन्द्रः स्रवितवे पृथिव्या || 8 ||
वृषीभिः पुत्रमृगुवो अदानं निवेशनाद्धरिव आ जभर्थ |
व्यशन्धो अख्यदहिमाददानो निभूदुखच्छित्समरन्त पर्व || 9 ||
प्र ते पूर्वाणि करणानि विप्राविद्धां आह विदुषे करांसि |
यथायथा वृष्यानि स्वगूर्तापांसि राजन्नर्याविवेषीः || 10 ||
नू ष्टु इन्द्र नू गृणान इषं जरित्रे नद्योरे न पीपेः |
अकारि ते हरिवो ब्रह्म नव्यं धिया स्याम रथ्यः सदासाः || 11 ||

(11)

20

(म.4, अनु.2)

ऋषिः वामदेवः गौतमः

छन्दः त्रिष्टुप्

देवता इन्द्रः

आ न इन्द्रो दूरादा न आसादभिष्टिकृदवसे यासदुग्रः |
ओजिष्ठेभिर्नृपतिर्वज्रबाहुः संगे समत्सु तुर्वणिः पृतन्यून् || 1 ||
आ न इन्द्रो हरिभिर्यात्वच्छार्वाचीनोऽवसे राधसे च |
तिष्ठाति वज्री मघवा विरुषीमं यज्ञमनु नो वाजसातौ || 2 ||

इमं यज्ञं त्वमस्माकमिन्द्र पुरो दधत्सनिष्यसि क्रतुं नः	
श्वधीव वज्रिन्त्सुनये धनानां त्वया वयमर्य आजिं जयेम	॥ 3 ॥
उशत्रु षु णः सुमना उपाके सोमस्य नु सुषुतस्य स्वधावः	
पा इन्द्र प्रतिभृतस्य मध्वः समन्धसा ममदः पृष्ठ्येन	॥ 4 ॥
वि यो ररुषा ऋषिभिर्नवेभिर्वृक्षो न पृक्कः सृण्यो न जेता	
मर्यो न योषामुभि मन्यमानोऽच्छा विवक्मि पुरुहूतमिन्द्रम्	॥ 5 ॥
गिरिन यः स्वतवां ऋष्व इन्द्रः सनादेव सहसे जात उग्रः	
आदता वज्रं स्थविरं न भीम उद्रेव कोशं वसुना न्यष्टम्	॥ 6 ॥
न यस्य वर्ता जनुषा न्वस्ति न राधस आमरीता मघस्य	
उद्धावृषाणस्तविषीव उग्रास्मभ्यं दद्धि पुरुहूत रायः	॥ 7 ॥
ईक्षे रायः क्षयस्य चर्षणीनामुत व्रजमपवर्तासि गोनाम्	
शिक्षानरः समित्थेषु प्रहावान्वस्वो राशिमभिनेतासि भूरिम्	॥ 8 ॥
कया तच्छृण्वे शच्या शचिष्ठो यया कृणोति मुहु का चिदृष्वः	
पुरु दाशुषे विचयिष्ठो अंहोऽथा दधाति द्रविणं जरित्रे	॥ 9 ॥
मा नो मधीरा भरा दद्धि तन्नः प्र दाशुषे दातवे भूरि यतै	॥
नव्ये देष्णे शस्ते अस्मिन्त उक्थे प्र ब्रवाम वयमिन्द्र स्तुवन्तः	॥ 10 ॥
नू ह्युत इन्द्र नू गृणान इषं जरित्रे नद्योर् न पीपेः	
अकारि ते हरिवो ब्रह्म नव्यं धिया स्याम रथ्यः सदासाः	॥ 11 ॥

(11)

21

(म.4, अनु.2)

ऋषिः वामदेवः गौतमः	छन्दः त्रिष्टुप्	देवता इन्द्रः
--------------------	------------------	---------------

आ यात्विन्द्रोऽवस उषं न इह स्तुतः संधमादस्तु शूरः	
वावृधानस्तविषीर्यस्य पूर्वोद्यौर्न क्षत्रमभिभूति पुष्यात्	॥ 1 ॥
तस्येदिह स्तवथ वृष्यानि तुविद्युमस्य तुविराधसो नृन्	
यस्य क्रतुर्विदुथ्योर् न सम्राट् साहान्तरुत्रो अभ्यस्ति कृष्टीः	॥ 2 ॥
आ यात्विन्द्रो दिव आ पृथिव्या मक्षू समुद्रादुत वा पुरीषात्	
स्वर्णरादवसे नो मरुत्वान्परावतो वा सदनादृतस्य	॥ 3 ॥
स्थूरस्य रायो बृहतो य ईशे तमु ष्टवाम विदथेष्विन्द्रम्	
यो वायुना जयति गोमतीषु प्र धृष्णुया नयति वस्यो अच्छ	॥ 4 ॥
उप यो नमो नमसि स्तभायन्निर्यति वाचं जनयन्वजध्वै	
ऋञ्जसानः पुरुवार उक्थैरेन्द्रं कृण्वीत् सदनेषु होता	॥ 5 ॥
धिषा यदि धिषण्यन्तः सरण्यान्सदन्तो अद्रिमौशिजस्य गोहे	

आ दुरोषाः पास्त्यस्य होता यो नो महान्तसंवरणेषु वह्निः	॥ 6 ॥
सत्रा यदी भार्वरस्य वृष्णः सिषक्ति शुष्मः स्तुवते भराय	
गुहा यदीमौशिजस्य गोहे प्र यद्धिये प्रायसे मदाय	॥ 7 ॥
वि यद्वरांसि पर्वतस्य वृणवे पयोभिर्जिन्वे अपां जवांसि	
विदद्वौरस्य गव्यस्य गोहे यदी वाजाय सुध्योर् वहन्ति	॥ 8 ॥
भद्रा ते हस्ता सृकृतोत पाणी प्रयन्तारां स्तुवते राधे इन्द्र	
का ते निषक्तिः किमु नो ममत्सि किं नोदुदु हर्षसे दात्वा उ	॥ 9 ॥
एवा वस्व इन्द्रः सत्यः सम्राड्भन्ता वृत्रं वरिवः पूरवे कः	
पुरुष्टुत् क्रत्वा नः शग्धि रायो भक्षीय तेऽवसो दैव्यस्य	॥ 10 ॥
नू ष्टु इन्द्र नू गृणान इषं जरित्रे नद्योर् न पीपेः	
अकारि ते हरिवो ब्रह्म नव्यं धिया स्याम रुथ्यः सदासाः	॥ 11 ॥

(11)

22

(म.4, अनु.3)

ऋषिः वामदेवः गौतमः	छन्दः त्रिष्टुप्	देवता इन्द्रः
--------------------	------------------	---------------

यत्र इन्द्रो जुजुषे यच्च वष्टि तन्नो महान्करति शुष्या चित्	
ब्रह्म स्तोमं मघवा सोममुक्था यो अश्मानं शवसा बिभ्रदेति	॥ 1 ॥
वृषा वृषन्धिं चतुरश्रिमस्यत्रुगो बाहुभ्यां नृतमः शचीवान्	
श्रिये परुष्णीमुषमाण ऊर्णा यस्याः पर्वाणि सख्याय विव्ये	॥ 2 ॥
यो देवो देवतमो जायमानो महो वाजेभिर्महद्भिश्च शुष्मैः	
दधानो वज्रं बाहोरुशन्तं द्याममेन रेजयत्प्र भूमं	॥ 3 ॥
विश्वा रोधांसि प्रवतश्च पूर्वीद्यौर्ऋष्वाञ्जनिमन्नेजत् क्षाः	
आ मात्रा भरति शुष्या गोर्नृवत्परिज्मन्नोनुवन्त वाताः	॥ 4 ॥
ता तू तं इन्द्र महतो महानि विश्वेष्वित्सर्वनेषु प्रवाच्या	॥
यच्छूर धृष्णो धृषता दधृष्वानहिं वज्रेण शवसाविवेषीः	॥ 5 ॥
ता तू तै सत्या तुविनृम्णा विश्वा प्र धेनवः सिस्रते वृष्णा ऊर्ध्वः	
अधा ह त्वद्वृषमणो भियानाः प्रसिन्धवो जवसा चक्रमन्त	॥ 6 ॥
अत्राह ते हरिवस्ता उ देवीरवोभिरिन्द्र स्तवन्त स्वसारः	
यत्सीमनु प्र मुचो बद्धधाना दीर्घामनु प्रसितिं स्यन्दयध्यै	॥ 7 ॥
पिपीळे अंशुर्मद्यो न सिन्धुरा त्वा शमी शशमानस्य शक्तिः	
अस्मद्र्यक्शुशुचानस्य यम्या आशुर्न र्शिमं तुव्योर्जसं गोः	॥ 8 ॥
अस्मे वर्षिष्ठा कृणुहि ज्येष्ठा नृम्णानि सत्रा संहुरे सहांसि	
अस्मभ्यं वृत्रा सुहनानि रन्धि जहि वर्धर्वनुषो मर्त्यस्य	॥ 9 ॥

अस्माकमित्सु शृणुहि त्वमिन्द्रास्मभ्यं चित्रां उप माहि वाजान् ।
 अस्मभ्यं विश्वा इषणः पुरंधीरस्माकं सु मघवन्बोधि गोदाः ॥ 10 ॥
 नू घृत इन्द्र नू गृणान इषं जरित्रे नद्योर् न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः ॥ 11 ॥

(11)

23

(म.4, अनु.3)

ऋषिः वामदेवः गौतमः

छन्दः त्रिष्टुप्

देवता इन्द्रः 1-7,11,

इन्द्रः ऋतदेवता वा 8-10

कथा महामवृधत्कस्य होतुर्यज्ञं जुषाणो अभि सोममूधः ।
 पिबन्नुशानो जुषमाणो अन्धो ववक्ष ऋष्वः शुचते धनाय ॥ 1 ॥
 को अस्य वीरः सधुमादमापु समानंश सुमतिभिः को अस्य ।
 कदस्य चित्रं चिकित्ते कदूती वृधे भुवच्छशमानस्य यज्योः ॥ 2 ॥
 कथा शृणोति ह्यमानमिन्द्रः कथा शृण्वन्नवसामस्य वेद ।
 का अस्य पूर्वीरुपमातयो ह कथैनमाहुः पपुरिं जरित्रे ॥ 3 ॥
 कथा सबाधः शशमानो अस्य नशदभि द्रविणं दीध्यानः ।
 देवो भुवन्नवेदा म ऋतानां नमो जगृभ्वां अभि यज्जुजोषत् ॥ 4 ॥
 कथा कदस्या उषसो व्युष्टौ देवो मर्तस्य सुख्यं जुजोष ।
 कथा कदस्य सुख्यं सखिभ्यो ये अस्मिन्कामं सुयुजं ततस्त्रे ॥ 5 ॥
 किमादमत्रं सुख्यं सखिभ्यः कदा नु ते भ्रात्रं प्र ब्रवाम ।
 श्रिये सुदृशो वपुरस्य सर्गाः स्वर्णं चित्रतममिष आ गोः ॥ 6 ॥
 द्रुहं जिघांसन्ध्वरसमनिन्द्रां तेतिके तिग्मा तुजसे अनीका ।
 ऋणा चिद्यत्र ऋण्या न उग्रो दूरे अज्ञाता उषसो बबाधे ॥ 7 ॥
 ऋतस्य हि शुरुधुः सन्ति पूर्वोऋतस्य धीतिर्वीजिनानि हन्ति ।
 ऋतस्य श्लोको बधिरा ततर्द कर्णा बुधानः शुचमान आयोः ॥ 8 ॥
 ऋतस्य दृळ्हा धरुणानि सन्ति पुरूणि चन्द्रा वपुषे वपूषि ।
 ऋतेन दीर्घमिषणन्त पृक्षं ऋतेन गावं ऋतमा विवेशुः ॥ 9 ॥
 ऋतं येमान ऋतमिद्वनोत्यृतस्य शुष्मस्तुरया उं गव्युः ।
 ऋताय पृथ्वी बहुले गभीरे ऋताय धेनू परमे दुहाते ॥ 10 ॥
 नू घृत इन्द्र नू गृणान इषं जरित्रे नद्योर् न पीपेः ।
 अकारि ते हरिवो ब्रह्म नव्यं धिया स्याम रथ्यः सदासाः ॥ 11 ॥

ऋषिः वामदेवः गौतमः

छन्दः त्रिष्टुप् 1-9,11, अनुष्टुप् 10

देवता इन्द्रः

का सुष्टुतिः शर्वसः सुनुमिन्द्रमर्वाचीनं राधस आ ववर्तत्	
दुर्दिहि वीरो गृणते वसूनि स गोपतिर्निषिधां नो जनासः	॥ 1 ॥
स वृत्रहत्ये हव्यः स ईड्यः स सुष्टुत् इन्द्रः सत्यराधाः	
स यामन्ना मघवा मर्त्याय ब्रह्मण्यते सुष्वये वरिवो धात्	॥ 2 ॥
तमिन्नरो वि ह्वयन्ते समीके रिरिक्कांसस्तन्वः कृण्वत् त्राम्	
मिथो यत्यागमुभयासो अगम्नरस्तोकस्य तनयस्य सातौ	॥ 3 ॥
क्रतूयन्ति क्षितयो योग उग्राशुषाणासौ मिथो अर्णसातौ	
सं यद्विशोऽववृत्रन्त युध्मा आदिन्नेम इन्द्रयन्ते अभीके	॥ 4 ॥
आदिद्ध नेम इन्द्रियं यजन्त आदित्पुक्तिः पुरोळाशं रिरिच्यात्	
आदित्सोमो वि पृच्यादसुष्वीनादिज्जुजोष वृषभं यजध्वै	॥ 5 ॥
कृणोत्यस्मै वरिवो य इत्थेन्द्राय सोममुशते सुनोति	
सुध्रीचीनेन मनसाविवेनन्तमित्सखायं कृणुते समत्सु	॥ 6 ॥
य इन्द्राय सुनवत्सोममद्य पचात्पक्तीरुत भृञ्जाति धानाः	
प्रति मनायोरुचथानि हर्यन्तस्मिन्दधृषणं शुष्मिन्द्रः	॥ 7 ॥
यदा संमर्यं व्यचेदघावा दीर्घं यदाजिमभ्यख्यदर्यः	
अचिक्रदधृषणं पत्यच्छा दुरोण आ निशितं सोमसुद्धिः	॥ 8 ॥
भूर्यसा वस्त्रमचरत्कनीयोऽविक्रीतो अकानिषं पुनर्यन्	
स भूर्यसा कनीयो नारिरेचीद्वीना दक्षा वि दुहन्ति प्र वाणम्	॥ 9 ॥
क इमं दशभिर्ममेन्द्रं क्रीणाति धेनुभिः	
यदा वृत्राणि जङ्घनदथैनं मे पुनर्ददत्	॥ 10 ॥
नू ष्टु इन्द्र नू गृणान इषं जरित्रे नद्योर् न पीपेः	
अकारि ते हरिवो ब्रह्म नव्यं धिया स्याम रथ्यः सदासाः	॥ 11 ॥

ऋषिः वामदेवः गौतमः

छन्दः त्रिष्टुप्

देवता इन्द्रः

को अद्य नर्यो देवकाम उशन्निन्द्रस्य सुख्यं जुजोष	
को वा महेऽवसे पार्याय समिद्धे अग्रौ सुतसौम ईद्वे	॥ 1 ॥
को नानाम् वचसा सोम्याय मनायुर्वा भवति वस्त उस्नाः	
क इन्द्रस्य युज्यं कः संखित्वं को भ्रात्रं वष्टि क्वये क ऊती	॥ 2 ॥
को देवानामवो अद्या वृणीते क आदित्यां अदितिं ज्योतिरीद्वे	
कस्याश्विनाविन्द्रो अग्निः सुतस्यांशोः पिबन्ति मनसाविवेनम्	॥ 3 ॥

तस्मा अग्निर्भारतः शर्मं यंसुज्योक्पश्यात्सूर्यमुच्चरन्तम्	
य इन्द्राय सुनवामेत्याह नरे नर्याय नृत्तमाय नृणाम्	॥ 4 ॥
न तं जिन्वन्ति ब्रह्मो न दुभ्रा उर्वस्मा अर्दितिः शर्मं यंसत्	
प्रियः सुकृत्प्रिय इन्द्रे मनायुः प्रियः सुप्रावीः प्रियो अस्य सोमी	॥ 5 ॥
सुप्राव्यः प्राशुषाळेष वीरः सुष्वैः पक्तिं कृणुते केवलेन्द्रः	
नासुष्वेरापिर्न सखा न जामिर्दुष्प्राव्योऽवहन्तेदवाचः	॥ 6 ॥
न रेवतां पृणिनां सख्यमिन्द्रोऽसुन्वता सुतपाः सं गृणीते	
आस्य वेदः खिदति हन्ति नृग्रं वि सुष्वये पक्तये केवलो भूत्	॥ 7 ॥
इन्द्रं परेऽवरे मध्यमासु इन्द्रं यान्तोऽर्वसितासु इन्द्रम्	
इन्द्रं क्षियन्त उत युध्यमाना इन्द्रं नरो वाजयन्तो हवन्ते	॥ 8 ॥

(7)

26

(म.4, अनु.3)

ऋषिः वामदेवः गौतमः, इन्द्रः वा 1-3,	छन्दः त्रिष्टुप्	देवता इन्द्रः आत्मा वा 1-3,
श्येनः (सुपर्णात्मा ब्रह्म) 4-7		

अहं मनुरभवं सूर्यश्चाहं कक्षीवाँ ऋषिरस्मि विप्रः	
अहं कुत्समार्जुनेयं नृञ्जेऽहं कविरुशाना पश्यता मा	॥ 1 ॥
अहं भूमिमददामार्यायाहं वृष्टिं दाशुषे मर्त्याय	
अहमपो अनयं वावशाना मम देवासो अनु केतमायन्	॥ 2 ॥
अहं पुरो मन्दसानो व्यैरुं नव साकं नवतीः शम्बरस्य	
शततमं वेश्यं सर्वताता दिवोदासमतिथिग्वं यदावम्	॥ 3 ॥
प्र सु ष विभ्यो मरुतो विरस्तु प्र श्येनः श्येनेभ्य आशुपत्वा	
अचक्रया यत्स्वधया सुपर्णो हव्यं भरन्मनवे देवजुष्टम्	॥ 4 ॥
भरद्यदि विरतो वेर्विजानः पथोरुणा मनोजवा असर्जि	
तूयं ययौ मधुना सोम्येनोत श्रवो विविदे श्येनो अत्र	॥ 5 ॥
ऋजीपी श्येनो ददमानो अंशुं परावतः शकुनो मन्द्रं मदम्	
सोमं भरद्वाहहाणो देवावान्दिवो अमुष्मादुत्तरादादाय	॥ 6 ॥
आदाय श्येनो अभरत्सोमं सहस्रं सवाँ अयुतं च साकम्	
अत्रा पुरंधिरजहादरातीर्मदे सोमस्य मूरा अमूरः	॥ 7 ॥

(5)

27

(म.4, अनु.3)

ऋषिः वामदेवः गौतमः

छन्दः त्रिष्टुप् 1-4, शकरी 5 देवता श्येनः 1-4, श्येनः इन्द्रः वा 5

गर्भे नु सन्नन्वेषामवेदमहं देवानां जनिमानि विश्वा	
शतं मा पुर आर्यसीररक्षन्नध श्येनो ज्वसा निरदीयम्	1
न घा स मामप जोषं जभाराभीमासु त्वक्षसा वीर्येण	
ईर्मा पुरंधिरजहादरातीरुत वाताँ अतरच्छूशुवानः	2
अव यच्छ्येनो अस्वनीदध द्योर्वि यद्यदि वात ऊहुः पुरंधिम्	
सृजद्यदस्मा अव ह क्षिपज्यां कृशानुरस्ता मनसा भुरण्यन्	3
ऋजिप्य ईमिन्द्रावतो न भुज्युं श्येनो जभार बृहतो अधि ष्णोः	
अन्तः पंतत्पत्र्यस्य पूर्णमधु यामनि प्रसितस्य तद्वेः	4
अध श्वेतं कुलशं गोभिरक्तमापिप्यानं मघवां शुक्रमन्धः	
अध्वर्युभिः प्रयतं मध्वो अग्रमिन्द्रो मदाय प्रति	
धृत्पिबध्यै शूरो मदाय प्रति धृत्पिबध्यै	5

(5)

28

(म.4, अनु.3)

ऋषिः वामदेवः गौतमः

छन्दः त्रिष्टुप्

देवता इन्द्रासोमौ (इन्द्रः वा)

त्वा युजा तव तत्सोम सुख्य इन्द्रो अपो मनवे सुस्रुतस्कः	
अहन्नहिमरिणात्सप्त सिन्धूनपावृणोदपिहितेव खानि	1
त्वा युजा नि खिदत्सूर्यस्येन्द्रश्चक्रं सहसा सद्य इन्दो	
अधि ष्णुना बृहता वर्तमानं महो द्रुहो अप विश्वायु धायि	2
अहनिन्द्रो अदहदग्रिरिन्दो पुरा दस्युन्मध्यंदिनादभीके	
दुर्गे दुरोणे क्रत्वा न यातां पुरु सहस्रा शर्वा नि बर्हीत्	3
विश्वस्मात्सीमधुमाँ इन्द्र दस्युन्विशो दासीरकृणोरप्रशस्ताः	
अबाधेथाममृणतं नि शत्रूनविन्देथामपचितिं वधत्रैः	4
एवा सत्यं मघवाना युवं तदिन्द्रश्च सोमोर्वमश्व्यं गोः	
आददत्तमपिहितान्यश्ना रिरिचथुः क्षाश्चित्तृदाना	5

(5)

29

(म.4, अनु.3)

ऋषिः वामदेवः गौतमः

छन्दः त्रिष्टुप्

देवता इन्द्रः

आ नः स्तुत उप वाजेभिरूती इन्द्र याहि हरिभिर्मन्दसानः	
तिरश्चिदुर्यः सर्वना पुरुण्याङ्गुषेभिर्गृणानः सत्यराधाः	1
आ हि ष्मा याति नर्याश्चिकित्वान्हूयमानः सोतृभिरुप यज्ञम्	
स्वश्वो यो अभीरुर्मन्यमानः सुष्वाणेभिर्मदति सं ह वीरैः	2

श्रावयेदस्य कर्णां वाज्यध्वै जुष्टामनु प्र दिशं मन्द्यध्वै	
उद्धावृषाणो राधसे तुविष्मान्करं इन्द्रः सुतीर्थाभयं च	3
अच्छा यो गन्ता नाधमानमूती इत्था विप्रं हवमानं गृणन्तम्	
उप त्मनि दधानो धुर्यांशून्सहस्राणि शतानि वज्रबाहुः	4
त्वोतासो मघवन्निन्द्र विप्रा वयं ते स्याम सूरयो गृणन्तः	
भेजानासौ बृहद्विवस्य राय आकाय्यस्य दावने पुरुक्षोः	5

(24)

30

(म.4, अनु.3)

ऋषिः वामदेवः गौतमः	छन्दः गायत्री 1-7,9-23, अनुष्टुप् 8,24	देवता इन्द्रः 1-8,12-24,
इन्द्रोषसौ 9-11		

नकिरिन्द्र त्वदुत्तरो न ज्यायाँ अस्ति वृत्रहन्	नकिरेवा यथा त्वम्	1
सत्रा ते अनु कृष्टयो विश्वा चक्रेवं वावृतुः	सत्रा महां असि श्रुतः	2
विश्वे चनेदुना त्वा देवास इन्द्र युयुधुः	यदहा नक्तुमातिरः	3
यत्रोत बाधितेभ्यश्चक्रं कुत्साय युध्यते	मुषाय इन्द्र सूर्यम्	4
यत्र देवाँ ऋघायतो विश्वाँ अयुध्य एक इत्	त्वमिन्द्र वनूरहन्	5
यत्रोत मर्त्याय कमरिणा इन्द्र सूर्यम्	प्रावः शचीभिरेतशम्	6
किमादुतासि वृत्रहन्मघवन्मन्युमत्तमः	अत्राह दानुमातिरः	7
एतद्घेदुत वीर्यंमिन्द्रं चकर्थ पौंस्यम्	स्त्रियं यदुर्हणायुवं वधीर्दुहितरं दिवः	8
दिवश्चिद्घा दुहितरं महान्महीयमानाम्	उषासमिन्द्र सं पिणक्	9
अपोषा अनसः सरत्संपिष्टादहं बिभ्युषी	नि यत्सीं शिश्रथदृषा	10
एतदस्या अनः शये सुसंपिष्टं विपाश्या	ससारं सीं परावतः	11
उत सिन्धुं विबाल्यं वितस्थानामधि क्षमि	परिं ष्टा इन्द्र मायया	12
उत शुष्णास्य धृष्णुया प्र मृक्षो अभि वेदनम्	पुरो यदस्य संपिणक्	13
उत दासं कौलितरं बृहतः पर्वतादधि	अवाहन्निन्द्र शम्बरम्	14
उत दासस्य वर्चिनः सहस्राणि शतावधीः	अधि पञ्च प्रधीरिव	15
उत त्यं पुत्रमगुवः परावृक्तं शतक्रतुः	उक्थेष्विन्द्र आभजत्	16
उत त्या तुर्वशायदू अस्नातारा शचीपतिः	इन्द्रो विद्वान् अपारयत्	17
उत त्या सद्य आर्यां सुरयोरिन्द्र पारतः	अर्णांचित्ररथावधीः	18
अनु द्वा जहिता नयोऽन्धं श्रोणं च वृत्रहन्	न तत्ते सुम्रमष्टवे	19
शतमशमन्मयीनां पुरामिन्द्रो व्यास्यत्	दिवोदासाय दाशुषे	20
अस्वापयद्वभीतये सहस्रा त्रिंशतं हथैः	दासानामिन्द्रो मायया	21
स घेदुतासि वृत्रहन्समान इन्द्र गोपतिः	यस्ता विश्वानि चिच्युषे	22

उत नूनं यदिन्द्रियं करिष्या इन्द्र पौंस्यम् । अद्या नकिष्टदा मिनत् ॥ 23 ॥

वामं वामं त आदुरे देवो ददात्वयमा । वामं पूषा वामं भगो वामं देवः करूळती ॥ 24 ॥

(15)

31

(म.4, अनु.3)

ऋषिः वामदेवः गौतमः

छन्दः गायत्री 1-2,4-15, पादनिचृत् गायत्री 3

देवता इन्द्रः

कया नश्चित्र आ भुवदूती सदावृधः सखा । कया शचिष्ठया वृता ॥ 1 ॥

कस्त्वा सत्यो मदानां मंहिष्ठो मत्सुदन्धसः । दृळ्हा चिदारुजे वसु ॥ 2 ॥

अभी षु णः सखीनामविता जरितृणाम् । शतं भवास्यूतिभिः ॥ 3 ॥

अभी न आ ववृत्स्व चक्रं न वृत्तमर्वतः । नियुद्धिश्चर्षणीनाम् ॥ 4 ॥

प्रवता हि क्रतूनामा हा पदेव गच्छसि । अभक्षि सूर्ये सचा ॥ 5 ॥

सं यत्त इन्द्र मन्यवः सं चक्राणि दधन्विरे । अध त्वे अध सूर्ये ॥ 6 ॥

उत स्मा हि त्वामाहुरिन्मघवानं शचीपते । दातारमविदीधयुम् ॥ 7 ॥

उत स्मा सद्य इत्परि शशमानाय सुन्वते । पुरू चिन्महसे वसु ॥ 8 ॥

नहि ष्मा ते शतं चन राधो वरन्त आमुरः । न च्यौत्वानि करिष्यतः ॥ 9 ॥

अस्माँ अवन्तु ते शतमस्मान्सहस्रमूतयः । अस्मान्विश्वा अभिष्टयः ॥ 10 ॥

अस्माँ इहा वृणीष्व सख्याय स्वस्तये । महो राये दिवित्मते ॥ 11 ॥

अस्माँ अविद्धि विश्वहेन्द्र राया परीणसा । अस्मान्विश्वाभिरूतिभिः ॥ 12 ॥

अस्मभ्यं ताँ अपा वृधि ब्रजाँ अस्तेव गोमतः । नवाभिरिन्द्रोतिभिः ॥ 13 ॥

अस्माकं धृष्णुया रथोँ द्युमाँ इन्द्रानपच्युतः । गव्युरंश्चयुरीयते ॥ 14 ॥

अस्माकमुत्तमं कृधि श्रवोँ देवेषु सूर्य । वर्षिष्ठं द्यामिवोपरि ॥ 15 ॥

(24)

32

(म.4, अनु.3)

ऋषिः वामदेवः गौतमः

छन्दः गायत्री

देवता इन्द्रः 1-22, इन्द्राश्वौ 23-24

आ तू न इन्द्र वृत्रहन्नस्माकमर्धमा गहि । महान्महीभिरूतिभिः ॥ 1 ॥

भूमिश्चिद्धासि तूतुजिरा चित्र चित्रिणीष्वा । चित्रं कृणोष्युतये ॥ 2 ॥

दुभ्रेभिश्चिच्छशीयांसं हंसि ब्राधन्तमोजसा । सखिभिर्ये त्वे सचा ॥ 3 ॥

व्यमिन्द्र त्वे सचा व्यं त्वाभि नौनुमः । अस्माँअस्माँ इदुदेव ॥ 4 ॥

स नश्चित्राभिरद्विवोऽनवद्याभिरूतिभिः । अनाधृष्टाभिरा गहि ॥ 5 ॥

भूयामो षु त्वावतः सखाय इन्द्र गोमतः । युजो वाजाय घृष्वये ॥ 6 ॥

त्वं ह्येक ईशिष इन्द्र वाजस्य गोमतः । स नो यन्धि महीमिषम् ॥ 7 ॥

न त्वा वरन्ते अन्यथा यदित्ससि स्तुतो मघम् । स्तोतृभ्य इन्द्र गिर्वणः ॥ 8 ॥

अभि त्वा गोतमा गिरानूषत् प्र दावने । इन्द्र वाजाय घृष्वये ॥ 9 ॥

प्र ते वोचाम वीर्यां३ या मन्दसान आरुजः	पुरो दासीरुभीत्य	॥ 10 ॥
ता ते गृणन्ति वेधसो यानि चकर्थ पौस्या	सुतेष्विन्द्र गिर्वणः	॥ 11 ॥
अवीवृधन्त गोतमा इन्द्र त्वे स्तोमवाहसः	एषु धा वीरवृद्यशः	॥ 12 ॥
यच्चिद्धि शश्वतामसीन्द्र साधारणस्त्वम्	तं त्वा वयं हवामहे	॥ 13 ॥
अर्वाचीनो वसो भवास्मे सु मत्स्वान्धसः	सोमानामिन्द्र सोमपाः	॥ 14 ॥
अस्माकं त्वा मतीनामा स्तोमं इन्द्र यच्छतु	अर्वागा वर्तया हरी	॥ 15 ॥
पुरोळाशं च नो घसो ज्योषयासे गिरश्च नः	वधूयुरिव योषणाम्	॥ 16 ॥
सहस्रं व्यतीनां युक्तानामिन्द्रमीमहे	शतं सोमस्य खुर्यः	॥ 17 ॥
सहस्रां ते शता वयं गवामा च्यावयामसि	अस्मत्रा राध एतु ते	॥ 18 ॥
दशं ते कृलशानां हिरण्यानामधीमहि	भूरिदा असि वृत्रहन्	॥ 19 ॥
भूरिदा भूरि देहि नो मा दुभ्रं भूर्या भर	भूरि घेदिन्द्र दित्ससि	॥ 20 ॥
भूरिदा ह्यसि श्रुतः पुरुत्रा शूर वृत्रहन्	आ नो भजस्व राधसि	॥ 21 ॥
प्र ते बभ्रू विचक्षणं शंसामि गोषणो नपात्	माभ्यां गा अनुं शिश्रथः	॥ 22 ॥
कनीनकेव विद्रधे नवे द्रुपदे अर्भके	बभ्रू यामेषु शोभेते	॥ 23 ॥
अरं म उस्रयाम्णेऽरमनुस्रयाम्णे	बभ्रू यामेष्वसिधा	॥ 24 ॥

॥ इति तृतीयाष्टके षष्ठोऽध्यायः समाप्तः ॥